



Broj: 01/12-02-288/24
Datum: 24.01.2024. godine

PREDSTAVNIČKOM DOMU
PARLAMENTA FEDERACIJE BiH

Bosna i Hercegovina
Federacija Bosne i Hercegovine
**PARLAMENT FEDERACIJE
SARAJEVO**

Primljeno: 24-01-2024			
Org. jed.	Broj	Priloga	Vrijednost

Komisija za pitanja mladih Predstavničkog doma Parlamenta Federacije BiH (u daljnjem tekstu: Komisija) na 1. Vanrednoj sjednici, održanoj 24.01.2024. godine razmatrala je sljedeći dnevni red:

1. Prijedlog Budžeta Federacije BiH za 2024. godinu, hitni postupak
2. Prijedlog zakona o izvršenju Budžeta Federacije BiH za 2024. godinu, hitni postupak
3. Tekuća pitanja.

Na osnovu člana 44. a u vezi sa članom 68. Poslovnika Predstavničkog doma Parlamenta Federacije Bosne i Hercegovine, Komisija Predstavničkom domu podnosi sljedeći:

IZVJEŠTAJ

Ad-1. Prijedlog Budžeta Federacije BiH za 2024. godinu, hitni postupak

Predsjednik Komisije dao je uvodna obrazloženja i napomene. Otvorio je diskusiju u kojoj su učestvovali članovi Komisije. Predsjednik je dao prijedlog da se obavi zajednička rasprava o tačkama 1.i 2. dnevnog reda.

Nakon rasprave, a imajuću u vidu vanredne okolnosti oko dostavljanja prijedloga Budžeta FBiH za 2024. godinu, jednoglasno je usvojen zaključak da se Komisija za pitanja mladih neće izjašnjavati o Budžetu Federacije BiH za 2024. godinu, budući da sjednici Komisije ne prisustvuje ovlašteni predlagač kako to propisuje Poslovnik Predstavničkog doma.

Ad – 2. Prijedlog zakona o izvršenju Budžeta Federacije BiH za 2024. godinu, hitni postupak

Budući da je obavljena zajednička diskusija, zaključak iz tačke Ad-1. se odnosi i na tačku Ad-2.

Ad-3. Tekuća pitanja

U okviru ove tačke dnevnog reda Komisija za pitanja mladih u skladu sa članom 184. Poslovnika Predstavničkog doma Parlamenta Federacije BiH ("Službene novine Federacije BiH" broj: 69/07, 02/08 i 78/08), ulaže **amandman na Prijedlog budžeta Federacije BiH za 2024. godinu, čiji je predlagač Vlada FBiH**, kako slijedi:

AMANDMAN

Za iznos od 600.000 KM umanjiti:

Razdjel: 16

1601 Federalno ministarstvo finansija

614 Tekući transferi i drugi tekući rashodi

6141 "Tekući transferi drugim nivoima vlasti i fondovima – KANTONI"

Navedeni iznos od 600.000 KM uvećati:

Razdjel: 52

5201 Federalno ministarstvo kulture i sporta

614 Tekući transferi i drugi tekući rashodi

6143: Tekući transferi neprofitnim organizacijama - Transfer za mlade, tako da na navedenoj poziciji umjesto 400.000 KM bude novi iznos od 1.000.000 KM.

OBRAZLOŽENJE

U Bosni i Hercegovini prema popisu stanovništva provedenom 2013. godine živjelo je 773.850 mladih starosne dobi od 15 do 30 godina života odnosno 21,91% populacije činili su mladi ljudi. Kada analiziramo prikazane brojke uočavamo da **svaka peta osoba** koja živi u Bosni i Hercegovini pripada kategoriji mladih.¹ U Federaciji Bosne i Hercegovine, od ukupnog stanovništva, 22,95% čine mlade osobe. Uzimajući u obzir "trend odlaska mladih", može se procijeniti i da je broj mladih koji žive u FBiH znatno manji u odnosu na navedeno.

Mladi u Bosni i Hercegovini, pa tako i u Federaciji BiH, napuštaju svoje mjesto prebivališta u svrhu pronalaska boljeg životnog standarda, sistema koji im može pružiti kvalitetnu budućnost, ali i sadašnjost. Kao glavne razloge odlaska navode nekvalitetan obrazovni sistem, nemogućnost zaposlenja, slabu zdravstvenu zaštitu i neadekvatno uključivanje u procese odlučivanja.

Da su ovi problemi zaista vidljivi u svakoj pori društva, prepoznala je i Komisija za pitanja mladih Predstavničkog doma Parlamenta Federacije BiH organizujući prvu Tematsku sjednicu za pitanja mladih, 22. maja 2022. godine, na kojoj se raspravljalo upravo o navedenim problemima. Komisija je tada usvojila set od **63 Zaključka i preporuke** u oblastima obrazovanja, zapošljavanja, zdravstvene zaštite, aktivizma i volontiranja mladih od kojih je jedan Zaključak upravo namijenjen povećanju Transfera za mlade a koji glasi: "*Zadužuje se Federalno ministarstvo kulture i sporta da planira povećanje izdvajanja za Transfer za mlade sa 400.000,00 KM na 1.000.000,00 KM za 2023. godinu i navedeni iznos izdvoji u Budžetu Federacije BiH za 2023. godine, a koji će biti namijenjen za provedbu Strategije prema mladima Federacije BiH i projekte za mlade.*" Nakon Tematske sjednice usvojeni su svi predloženi Zaključci i preporuke na 6. redovnoj sjednici Predstavničkog doma Parlamenta Federacije BiH održanoj 6. juna 2022. godine. Skoro dvije godine nakon usvajanja Zaključaka i preporuka, Transfer za mlade ostaje nepromijenjen.

Pored navedenih Zaključaka i preporuka koji su usvojeni 2022. godine kao mehanizam za poboljšanje standarda života mladih, važno je napomenuti mehanizme koji imaju svoje zakonsko uporište i direktno mogu doprinositi rješavanju prethodno spomenutih problema, a to je upravo Zakon o mladima Federacije BiH. Kao takav, Zakon o mladima Federacije BiH

¹ Westminster Fondacija za Demokratiju

prepoznaje ulaganje u mlade kao svrsishodan mehanizam podrške njihovom daljem razvoju i omogućavanju kvalitetnijeg života u društvu.

Transfer za mlade koji je usmjeren na podršku razvoju mladih u svim sferama društva, postoji kao budžetska stavka u Budžetu Federacije BiH tek od 2012. godine, ali već skoro 10 godina njegov iznos ostaje nepromijenjen. Time se ukazuje na nedovoljna ulaganja u mlade, politike koje se provode u svrhu poboljšanja njihovog položaja i kreiranje prostora za njihov razvoj i društveni doprinos. **Povećanje Transfera za mlade znači adekvatnu i punu provedbu zakonskih mehanizama usmjerenih na poboljšanje položaja mladih prepoznatih Zakonom o mladima FBiH**, a time i punu provedbu prve Strategije prema mladima FBiH.

Iz svega prethodno navedenog, vidljivo je da su prisutna minimalna ulaganja u mlade te da je masovni odlazak mladih iz države sve prisutniji čime potvrđujemo da su dosadašnje mjere nedovoljne i ne odgovaraju stvarnim potrebama mladih.

Ovim prijedlogom amandmana **apelujemo** na neophodnost povećanja Transfera za mlade kojim će se omogućiti potpuna sistemska briga o mladima, što će u dugoročnom planu sa sobom donijeti rezultate koji će se najviše odnositi na poboljšanje kvaliteta života mladih u Federaciji Bosne i Hercegovine.

U skladu sa članom 53. Poslovnika Predstavničkog doma za izvjestioca je određen Eldar Čomor, predsjednik Komisije.

PREDSJEDNIK KOMISIJE

Eldar Čomor